

二經同卷

太上洞玄靈寶本行宿緣經  
太上洞玄靈寶本行因緣經

世三

太上洞玄靈寶本行宿緣經

仙公請問太極真人高上法師曰人根本行何修而見世受福家門端正子孫昌熾與善因緣世世不絕死上生天堂下生人間侯王之家聰明儒仁敬信經教愛樂山林常誦微言終得仙道法師答言善哉子之問也夫人生各有本行宿緣命根種種相因願願相隨以類相從展轉相生禍福相引是以世世不絕玩好不同用心各異皆由先願也欲修道結緣賢聖當奉行大誠廣建福田弘施功德也或致飛仙或致天仙或致地仙或致命過生天堂或致為鬼神或致為六天大魔王官屬或致命過遷生侯王家人中之尊或為一切所仰賴富有天下或致才智聰明或致姿容端偉華潔清香或致仁愛忠孝貞潔簡素

或致善屬文翰動靜可以取則或致威嚴震爾眾人所敬或致為好三寶供養彌勤或致愛樂山水清靜玩經燒香齋戒或致禮拜玄宗或致轉女為男華容秀穎或致家門肅清世世因緣順其本願善賢才者為我子孫安貴无極或致見世受福命終受報或致後生獲慶得我宿功也夫道何謂哉以无心而應眾生四輩修福德要當有本願福之報也皆緣子于時立願耳功德既設志願亦定其報廣乃猶暮以待旦矣世間民人偽薄不信法言各稱鬼黥自用其意輕忽宿命以為妄造非笑至經以為虛誕而厚積嗜欲坐施立待報望速而應德遂令玄教遲昧世道交喪天人塗炭皆由其身立行致之太上所以痛心矣仙公曰宿命因緣生死報應聞之矣當何以為本行上誠乎答言太上智慧上誠百八十誠皆上誠律也能奉太上十誠亦得此福也今當為子說之豈不願奉之手仙公避席稽首曰唯唯天尊願便傳之矣我即奉之焉法師曰十誠者一者不得嫉妬勝己抑絕賢

明二者不得飲酒食肉穢亂三宮三者不得淫犯他妻女好貪細滑四者不得棄薄老病窮賤之人五者不得誹謗善人毀攻同學六者不得貪積財寶不肯施散七者不得殺生祠祀六天鬼神八者不得臆論經典以為虛誕九者不得背師恩愛欺詐新學十者平等一心仁孝一切能奉此十誠分明立願无不必報也夫人見世行惡而不報者是其先世餘福未盡福盡而禍至見世行善而不報者是其先世餘殃未盡殃盡而福至或後生受報不必在今世也人能見世大建善功必以功過相補乃可免先世殃對施恩望報則不報陰陽必然矣欲入仙道者功加塵沙之比其可為合也十惡不可犯一者飲酒淫色貪欲无已二者陰賊世間訕謗道士三者輕師慢法傲忽三寶四者竊取經書妄宣道要五者借換不還欺誘萬民六者殺生貪味口是心非七者背恩違義犯諸禁戒八者誦經忽略噴噀自是九者貴望人意嗔恚四輩十者臆斷經旨損益聖典不信宿命快情所為穢

慢四大不念生道是爲十惡之戒犯之者或見爲鬼神所枉殺陽官所考治居安即危履善遇惡可事不偶或死入地獄幽閉重檻不覩三光晝夜拷毒抱銅柱履刀山攀劍樹入鑊湯吞火煙臨寒水五世備經地獄既竟乃補三官徒役謫作山海鞭笞無數既竟當下生於世常爲下賤人或作僕使有人之形无人之情或生邊夷異國或生業疾惡惡相緣善善相因其罪福難說罪福之報如日月之垂光大海之朝宗必至之期萬无一失也罪福之不滅若影之隨形輪轉之對若車之輪矣。太極真人於是作奉誠頌曰

道以无心宗 一切作福田 立功无定主 本願各由人 虛已應衆生 注心莫不均 大聖宏至教 亦由雨降天 高陵靡不周 常卑固成淵 海爲百川王 是能舍龍鱗 萬劫保制用 宜但在厥年 奉戒不暫停 世世善結緣 精思念大乘 會當體道真 大極真人乃復作違誠頌曰

人根由本願 願定剋大志 淨想奉十誠

故能超八難 前生犯玄教 今生那得安 愚瞽忽性命 罪至乃長歎 對來如影響 視之令心寒 生值處下賤 慘戚无暫歡 仙公敢問齋之深淺功德高卑衆惡十善輪 轉運周无停德深功成入寂定虛階級緣何 法師答言夫一切云云皆當空盡有无相陶 修德養神積功凝真真身乃空出入有无隱 寂極妙保景希微濟度一切爲衆法橋輪轉 學道莫先乎齋齋者真過靈寶其法高妙不 可宜於世凡流之人常傳諸有宿世功德之 子自无前生重緣不令見之遇見亦不好皆 有本願而然也故不可强訓矣萬劫以來仙 聖口訣相傳秘而不書吾被太上命令授仙 公之子善書之焉此法饒益一切求道之士 也雖劫數運周是經不易矣道與世隆德隨 化與聖人難值道亦難見經亦難聞聖世難 遭賢人難遇也故非有善功之人不得預斯 會矣昔正一真人學道時受靈寶齋道成後 謂此齋尊重乃撰靈寶五稱文中出齋法爲 旨教經大同小異亦次本經齋法也太乙齋

法於此大齋玄之玄矣教初學小乘之階級 耳宗三洞玄經謂之大乘之士先度人後度 身坐起卧息常慈心一切皆念經營之无有 怠倦德並太上道超虛皇恩滿十方齋契玄 真薦提諸天願極道原

夫學道常淨潔衣服別靖燒香安高香座威 經禮拜精思存真吐納導養悔謝七世父母 及今世前世重罪惡緣布施立功長齋幽靜 定其本願當令心虛意玄然後真道可成也 善備巾褐單裙讀經被衣服法制則不得妄 借人著不淨處名曰法服法服恒有三神童 侍之昔有賢者迎一道士道士不得即往以 披褐赴之行至家其人敬信燒香禮之如見 道士神童見形云道士使我來主人于時不 知是神童主人病即除愈家門无恙神童語 主人曰病者已愈道士无煩復來賢者可送 法服還道士也主人如其語送至道士訊問 答曰一日疾苦奉請先生齋先生多事但遣 倦童不見願齋病人今已愈奉送法服道士 愕然默聽言畢答曰貧道一日整頓法事竟

往主人許賢者去亦不更來貧道是以不去  
非為負信亦無人可遣又不知君家病愈此  
乃當由主人心盡所致往人形貌何似主  
人答言年可十五六姿容端正似書生人也  
道士思唯我弟子都无此人恐神人降耳故  
法服當必令淨潔制作得法不爾鬼反害人  
威禁俱如明科也若朽敗當自衣之不得他  
用也仙公曰始聞法服之威神美請問十誠  
可得使奉耶真人答言我昔受之太上大道  
君吾奉行世世與善結緣當在福中致得仙  
道今以傳子念宗之焉昔有凡人奉持此戒  
念道不虧延壽益算家門隆盛願念後生大  
學聰明經典終入仙道滅度之日徑昇福堂  
衣食自然歡樂適意後下生於世乃學大道  
經聰明洞達為世法師无不曉了復有凡人  
大作功德齋誠然燈供養三寶翹勤不怠願  
生侯王之家得為貴人形容端偉命過之日  
飛天迎之徑昇天堂衣食自然歡樂充為下  
生諸侯王家為貴人之子聰明智慧姿容端  
正華潔清香復有貴人居政以道善作功德

齋誠施惠然燈悔罪解七世父母宿對緣結  
供養三寶願我後生世為貴人展轉福緣安  
容艷悅才識洞達恒值賢明供養三寶命過  
之日飛天迎之徑上福堂快樂不可言後即  
生國王之冢富貴倍先識度秀穎清高遠邁  
民豐家安復有貴人行是功德願念後生終  
入仙道其後世界好道受經无文不覽即得  
昇仙白日飛行復有凡人行是功德願我後  
生常見三洞大經後生便見大經受而誦之  
三界所敬復有凡人行是功德願為上學道  
十大博至經後生便為道士大學至經為眾  
法師復有凡人行是功德願我後生入山學  
道後生乃山棲巖側精思念道復有女人行  
是功德願轉身為男後生即為男子復有賢  
人行是功德助法師治經願我後生得遇經  
道仍如所願復有賢人行是功德誦經齋誠  
供養三寶一心念道願報七世父母因緣之  
思上生天堂反胎人間侯王之家我身昇仙  
長寂无為吾歷觀施惠修道者所求莫有不  
得要須本願願定无不報也其報喻如影響

之應四時之節矣但罪福不俱報其相差次  
功過推移或在來生或在見世罪福由人本  
行所習蓋非道德之悠誕也而人民皆欲交  
報為有驗推移後世謂之无靈愚夫因茲快  
情極慾輕忽天網而遭遇八難履觸十苦當  
斯之時莫曉所由不亦悲哉不亦悲哉人身  
假借覺會耳因恣而生恣散人死神真各去  
身亦分離變蟲而食之灰土為一切鬼受苦  
毒殊於生時豈不哀哉豈不哀哉惟得道體  
真身常安全得道之由積德行善輪身鍊神  
故致成真身焉復有凡人見道士靜齋然燈  
燒香禮拜旋行濟濟便發道心欲供養三寶  
其人家窮无他珍儲以數莖菜勸助中食是  
時心念使我後世富有得大供養三寶廣施  
福田既見世安穩壽極天命命終之日當入  
地獄受對之時太上有教其人先雖有少罪  
而翹勤精進功以補過便令昇福堂後生貴  
家世世公子福祿自然好樂道德供養三寶  
才識淵遠復有一人見真人道士齋靜讀經  
乃笑曰彼向空吟空經將欲何所希耶虛腹

日中一食此罪人耳道士乃慈心喻之故執  
意不釋其人後死徑入地獄拷毒五苦備致  
獄吏責辭列言生時非笑道士毀辱三寶今  
被此對後生方為下賤貧陋之民復有一人  
安容端正亦外學世經會見道書經義妙遠  
乃曰此似古人虛妄之談耳吾未解道士及  
賢貴耽玩之終日將欲何求乎其人即見世  
為惡鬼所殺強夭天命也死入地獄諸苦備  
受後生頑廢不在人倫復有道士輕法妄宣  
泄慢實經見世為考鬼所殺幽沈地獄後生  
業疾其苦難說是故經文不可不秘之恐有  
不能實用使彼此得罪又為人師甚亦不易  
授弟子不善罪皆相及人心難測莫不慳貪  
故聖人遺法以佞信效之聖聖相傳不言須  
信愚愚相授則非信不盡子豈不可慎之

真洞玄經三皇天文上清衆篇詠等皆是太  
上虛皇衆真十方自然真仙及帝君之隱位  
及諸天大聖衆諸天宮殿城臺山海立池或  
是太上之靈觀自然之寶闕并諸天之日月  
星辰城郭及門戶之銘或是大魔王官屬之  
內諱密字宮室之處所太上故撰而為文也  
是以不可毀謗妄宣矣若齋靜禮誦於玄上  
注心道真而誦經數句者則所言華華而響  
對是時太上玉京玄都八方諸天三千大千  
世界衆聖真人亦來到玉京山東方无極諸  
天安大宮鄉大千納善之世界衆聖玉京山  
東南无極諸天元福田大千用賢之世界衆  
聖玉京山南方无極諸天宛黎城境大衆衆  
賢之世界衆聖玉京山西南无極諸天延福  
鄉大千仁靜之世界衆聖玉京山西方无極  
諸天福堂州大千靜行之世界衆聖玉京山  
西北无極諸天福德之野大千延賢之世界  
衆聖玉京山北方无極諸天鸞單之野大千  
清靜之世界衆聖玉京山東北方无極諸天  
福集都大千長安之世界衆聖蓋太上玉京

山虛无玄都无極八方諸天諸地世界大聖  
真人位號亦悉在其中矣經語與世書語相  
似者此非世流俗之常辭也皆敷演玄真寂  
暢自然披散太上蔚羅天尊理蹟希微滌滯  
清神住年回劫遂成昇仙長存无極七祖生  
天堂是經高妙故曰玄之又玄子其焉哉道  
之至闢道體虛无弘之由人言三寶者道寶  
太上經寶師寶是為三寶三尊者道尊太上  
經尊師尊是為三尊也人身中稱三尊身中  
有三宮太一帝君公子无英是為三一之尊  
經言七祖父母上生天堂解結散滯或反胎  
人間侯王之家我身昇仙恒保福根者是七  
世父母因緣之報我身絕愛斷割胞元禮願  
之云七世父母上生天堂下生人中侯王之  
家此大孝之道洞經之旨矣至人之鍊形過  
於太陰政十月耳亦復須頃之間隱寂胞胎  
夫處胞胎之時亦未為陋夫人在胎中皆億  
宿命之事既生頓而忘之惟得道洞真自然  
知之所以語世人者欲使其修善行為來世  
作津梁耳夫言仙者遷也自凡至聖之漸也

真者堅也更无敗壞也從仙修之以成真人故仙人有階級真人有品次矣六天為三界大魔王領六天鬼神之事魔王承奉太上衆真天尊上人也道士功成魔王即保舉焉當成之時魔喜試之神正之與不正也道士魔王上官其尊太上經故以魔王位主鬼神皆其先世積福所致耳衆聖亦然

夫學道宜知先師我師是太上玉晨大道虛皇道之至尊也我是師第六弟子大聖衆皆師之弟子弟子无數也我師名波悅宗字維那訶今以告子子秘之哉蓋真人之名字亦難究矣此名字多是隱語也我名徐來勒字洪元甫夫學道不存師齋誦无感若妄宣不信之人則得罪於三官地獄三界六天上帝大魔王之下治在大北海天地之北方羅酆之山高二千六百里周旋三萬里內外皆七寶宮室亦盛都也天下鬼神之所宗處今以此天宮名號相示人能呪誦之者惡鬼不敢近妖邪伏藏禍害不侵魂精澄正神精澄正神炁常存也我師告曰吾學道修齋讀經

立功濟物事師恭勤彌劫歷年或生王家或生公門或生賤人或生諸天或生魔王或還墮地獄徒作三官經履十苦八難而執志不虧轉轉輪求道常為世人所笑亦不與言默目勗勵秉操日固行業愈新每事依經初不歌疑惑真值聖文遂得上仙身如金剛體真入妙希微洞質永享无量之壽也此故由吾專審柔仁慈愛受經不倦故耳非自然得道也夫道士之於家學者當建精舍清靜齋及施高座盛經并讀誦存思床方五尺其高亦然常燒香然燈不輟非同學者不令入也法服又不得妄借人經皆當師按校定本文盛其事欣欣常如對太上也勿得傲慢交笑論及流俗榮利之務若犯此者侍經仙童即奏入於三天司直三天司直上奏太上三奏太上子必失經也鬼神亂考恐不得以壽死將何仙之有哉經不從師受則元神炁修之不行侍經仙童恒司考人殃及七世父母受道不敬存師則三官紀錄鬼必橫害人受經穢慢不清靜者則見被誹謗之罪死後入地獄

竟當生六畜中經滂不以香湯洗沐則魂魄奔落為他鬼所拘錄受經未應宣傳便擅宣泄者則七祖囚於地獄身履三惡之考雖合傳非其人者罪同此科道士欲山居幽處宜先受經恭肅事師修諸善功以伏山神山无大小皆有神靈山大則神大山小則神小山神壞人亦不立也人不解至法不知修善立功此何以能久山棲乎水亦有神八海則有神王居焉江湖河濟皆有神也又龍王鬼神治其清淵矣河伯水官各有宮殿廟寺亦七寶銅珠皆類酆都之中悉為諸仙人之下官也並由人生時而學行業深淺功德大小計品受今之報也後世當更生人道隨其所行而報之萬无一失天地水三官書人功過善惡之事未有不備矣昔有貴人善信道教供養三寶治寫經書建立靖舍當成之時而貴人病篤第子親迎醫藥欲加苦治貴人曰吾少來敬順科誡敢斃忘之亦布施貧乏供養三寶建諸靜舍太上豈不知之人生有死死非所辭今所以恨者恨未得親持齋誦讀經

然燈行道禮謝七世之愆痾耳為我來生作  
橋梁者也我病之困將以命盡壽終醫藥可  
救狂癲耳當如我命何哉爾時太上遙觀十  
方善惡之人即勅司命延此人壽三十年於  
是豁然而愈身康便如未病之時兼尚將展  
精進日新修齋持誠奉行眾善供養三寶致  
世世富貴善人來生其家轉輪得道是人今  
為太上東華仙王也積善之教民豈不然哉  
豈不然哉

○ 太上洞玄靈寶本行宿緣經終

太上洞玄靈寶本行因緣經

吳赤烏三年歲在庚申正月一日壬子仙公  
登勞盛山靜齋念道是日中時有地仙道士  
三十三人詣座燒香禮經旋行甫畢仙公命  
坐良久道士於是避席請問曰下官等學道  
彌齡積稔于今六百甲子矣而尚散跡於山  
林間師尊始學道幸早被錫為太極左仙公  
登玉京入金闕禮无上座皇不審夙自作何  
功德蒙受天職致此巍巍三界壯觀所仰願  
為啓說宿命所由因緣根本也仙公曰子之  
所問遠乎微哉復坐吾將告爾夫一氣由虛  
无而生二儀由一氣而分清者為天濁者為  
地人受中氣而生與天地參為三才初无凡  
聖之異壽夭之殊混混沌沌不假修為而道  
自居既而混沌既鑿大朴既散人事錯錯而  
道違矣子輩前世學道受經少作善功唯欲  
度身不念度人唯自求道不念人得道不信  
大經弘遠之辭不務齋戒不尊三洞法師好  
樂小乘故得地仙之道然亦出處由意去來  
自在長生不死但未得起凌三界遊乎十方

仰瞻太上玉京金闕耳子欲使法輪速昇飛  
行上清諸天者當更立功救度國土民人災  
厄疾苦大功德滿太上錫迎子矣是以彭祖  
八百歲安期生千年白石生三千齡故遊民  
間皆坐其前世學法小功德薄故也乃有萬  
餘歲在山河中猶未昇天子但數百歲何足  
為久耶夫仙人寄於山林行陰德而昇仙及  
尸解託形者多顯迹於世國人所稱名書經  
傳者少矣時仙人有姓紀字法成仙公相之  
曰彼即我前世弟子也其未見宿命之根耳  
吾能令汝見前世時事也法成曰唯唯天尊  
須臾乃悟又手作禮弟子聞塞未識本行願  
無慙矣仙公曰昔帝堯之世汝隨我入嵩高  
山學汝志小望遠每譏吾虛誕所期遠遠所  
行難行復笑許由巢父絕尚箕山能辭堯禪  
交者之誨亦所未安常勸法成學上清道其  
於不從雖歛海不得滿腹徒叩石不獲玉菓  
許早昇太極宮吾今又方登左仙公之任汝  
獨為地仙但不死而已其德交集階子豈不  
悒悒乎於今乃知我言之有徵信而不欺矣